

## BITUING KAY NINGNING

Edel Resurreccion

Inianak sila ng digmaan,  
sa silong ng kadilimang  
sumasaklot sa lipunan,  
mga anak ng bayan...

Mahuhusay na supling  
ng mamamayan,  
kumapit sa armadong paglaban,  
upang pang-aapi't  
pagsasamantala'y wakasan...

Matatatag na mga larawan  
ng pansariling pangarap ay iniwan,  
ng pagtalikod sa layaw ng  
kanilang katawan...



Isang araw,  
sa lugar ding ito,  
ipagbubunyi ang tagumpay  
ng isa na namang taktikal na opensiba  
ng sumisinsin at lumalaganap  
na pakikidigmang gerilya  
alinsunod sa lawak at lalim  
ng rebolusyonaryong baseng masa!

*(Habang nagpapahinga at nagmamasid sa isang  
napakagandang lugar)*



### PAKIKIDIGMANG GERILYA

Criselda Magbanua  
Hunyo 11, 1999

Mula sa kung saan  
iipunin ang lakas  
ng paninindigan,  
ng pagkakaisa,  
ng tiwala,  
at kapasyahan.

### DETERMINASYON

Sagisag Tejero  
24 Marso 1999

Ang nilalandas mong masukal na daan  
Ay masalimuot at maraming hadlang  
Huwag pagugupo, huwag palilinlang  
Minsa'y guni-guni ang ating kalaban.

Laging ikikintal sa puso at isip  
Ang determinasyon at tibay ng dibdib  
Ito ang sandatang hindi malulupig  
Sa harap ng mga kaaway at ganid.

Ang pakikibaka'y di laging maalwan  
Ito ay digmaang buhay-kamatayan  
May mga hambalos mula sa kaaway  
Magkaminsan naman, sarili ang hadlang

Ang matagalang digmang ating sinusulong  
Kailangan ay tatag at determinasyon  
Mga kahinaan sa mga pagtugon,  
Di dapat manghina, bagkus ito'y hamon.

Mapanlabang diwa'y panghawakang ganap  
Ito'y pagyamanin at maging matatag  
Gawin itong gabay at dapat na magsikap  
Nang mapasakamay, tagumpay na hanap!



**KULIMLIM**  
KL  
Marso 1998



Dinadatnan ng balisa ang mandirigma  
Sa pagpanglaw ng buwan, sa pagsapit ng dapithapon  
Nilalamon ng lumbay, pinaghihinang katawan, kaluluwa  
At isip na labi sa pagod.

Ngunit walang kasing lupit ang pagal sa bukid  
O ang padustang sinapit sa pagawaan  
Ng mga anak ng bayang pinagsasamantalahan  
Mga anak ng bayang ngayo'y lumalaban.

Itakwil ang panlulumo, kasamang kapatid  
Kapit-bisig nating harapin ang hamon na nangbubulid  
Ating kakampi ang mamamayan ng daigdig  
Lalagot sa kadena ng pang-uusig!

Saligan ang mamamayang gupo sa selda ng krisis  
Salinan ng kapasyahan ang ating pagkakaisa  
Imperyalismo'y hahamunin ng mga naaapi  
Hanggang makamtan ang ganap na paglaya.

Mapagtatantong sariling lakas ang pagsanib sa karamihan  
Magtiwala sa kilusan sa pag-igpaw sa kahinaan.

Mula sa kung saan  
pakakawalan ang bigwas  
na hahagupit sa kaaway  
mag-iiwan ng libu-libong latay  
sa katawan nitong inaagnas  
ng sariling kasakiman.

Mula sa kung saan  
muling sasanib sa lupa  
muling kakalampagin ang makina  
muling sisisid sa umaapoy na dagat  
ng paghihimagsik.

Mula sa kung saan  
masisilayan ang tiyak na pagsikat  
ng mapulang araw sa silangan.



## MATAGALANG DIGMANG BAYAN

Adelina Diwata

13 Hunyo 1999

Naisin man nating matamo kaagad  
ang tagumpay  
sa isang kurap,  
o sa pawis na ilang patak,  
o sa ilang salitan lang ng dapithapon, bukanliwayway  
ay di maaari,



at dapat mawari,

na pag-iimbita ng sarili  
sa kumunoy ng kapahamakan  
ang anumang pagmamadali,

na ang ating digma'y  
tulad ng paghahabi—  
maingat, masinsin, mabusisi,

na bawat pagpapasya'y  
di dapat hinog sa pilit,  
bawat pangarap, hangaring matupad;  
bawat pagtupad, wastong paraan;  
bawat bigwas, sapat na lakas;  
bawat balak, tagumpay na tiyak,

upang ganap na maibagsak  
ang mga gahaman  
ng dakilang lakas  
ng mga inaaping nagsasalimbayan  
sa kumpas ng hangaring lumaya.

Ito'y matagalang digmang  
walang hanggan ang tagumpay.